

四庫全書

子部

欽定四庫全書

子部

宋高僧傳卷十二

詳校官監察御史

臣王爾烈

檢討

臣

何思鈞覆勘

總校官編修

臣王燕緒

校對官編修

臣馬啟泰

謄錄監生

臣胡

俊

欽定四庫全書

宋高僧傳卷十二

宋 釋贊寧 撰

習禪篇第三之五

正傳二十人
附見四人

唐杭州大慈山寰中傳

釋寰中姓盧氏河東蒲坂人也稟靈特異挺質殊倫身
支脯亭頂骨圓峻其聲若鐘響其色猶脂凝學通終古
辭實豐贍年二十五隨計中甲科然未塞其懷復思再

捷無何遭母之憂遂廬于墓所及服闋徑往北京童子
寺出家二稔未周諸經皆覽明年往嵩嶽登戒肄習律
部於茲博通忽慕上乘決往百丈山深得玄旨後隱南
嶽常樂寺結茅于山椒諫議大夫崔公深重其操因別
立方丈虞淵景晞一飯永日然其乏水羸瓶遠求俄爾
深宵有虎嗥嘯廬側詰旦視之果溫泉坼地而湧足其
汲用後之杭浙江之北有山號大慈居未久檀信爰臻
旋成巨院四方僧侶叅禮如雲屬武宗廢教中衣短褐

或請居戴氏別墅焉大中壬申歲太守劉公首命剌染
重盛禪林壬午歲二月十五日囑累聲畢而終時漸溽
暑驗其身一無變異而頂門煥潤冬寔于塔所享年八
十三法臘五十四有說常樂寺山虎跑泉當中公滅日
忽焉乾涸異哉止資中之受用耳至乾符丁酉歲敕謚
大師號性空塔名定慧也縉雲太守段成式為真讚焉

唐洛陽韶山寰普傳

釋寰普者不知何許人也稟形淳粹克性謙冲居于醜

夷下風請業汪汪然其識度輒難擬議具戒之後經論
溫尋然後杖錫南遊澧陽遇夾山而得心契有叅學舉
問垂手攜歸不使一機失其開誘其所不薦勸令披覽
經法亦近秀寂之遺風耳

唐衡山昂頭峯日照傳

釋日照姓劉氏岐下人也家世豪盛幼承庭訓博覽經
籍復於莊老而宿慧發揮思從釋子即往長安大興善
寺曇光法師下稟學納戒傳受經法靡所不精因遊嵩

獄問圓通之訣欣然趨入後遊南嶽登昂頭峯直拔蒼
翠便有終焉之志庵居二十載屬會昌武宗毀教照深
入巖窟飯粟飲流而延喘息大中宣宗重興佛法率徒
六十許人還就昂頭山舊基結苫蓋構舍宇復居一十
五年學人波委咸通中示滅春秋一百八歲至三年二
月三日入塔立碑存焉天下謂其禪學為昂頭照是歟

唐朗州德山院宣鑒傳

釋宣鑒姓周氏劍南人也生惡葷羶少多英敏宿賈異

操懇願出塵大龍不屈於小庭俊鶚必騰其層漢既除
美飾當預僧流從受近圓即窮律藏其諸性相貫習皆
通聞重湖間禪道大興乃抗志雲遊造龍潭信禪師則
石頭宗師之二葉也始唯獨居一室鑒強供侍之一夕
龍潭持一枝火投鑒鑒接而行數步且曰久聞龍潭到
來龍之與潭俱不見歟信曰子親到矣機與教符日親
大室三十餘年後止澧陽居無何屬武宗搜揚洎大中
還復法儀咸通初武陵太守薛延望堅請始居德山其

道芬磬四海禪徒輻湊伏臘堂中常有半千人矣其於
訓授天險海深難窺邊際雪峰叅見鑒深肯重以咸通
六年乙酉歲十二月三日忽告諸徒曰捫空追響勞汝
神邪夢覺覺非復有何事言訖安坐而化春秋八十四
僧臘六十五身據牀坐卓然七日如生在焉天下言激
箭之禪道者有德山門風焉今襄鄧漢東法孫極盛者
是

唐明州棲心寺藏奘傳

釋藏與俗姓朱氏蘓州華亭人也母方娠及誕常聞異香為兒時嘗墮井有神人接持而出卅歲出家禮道曠禪師及弱冠詣嵩嶽受具母每思念涕泣因一目不視迨其歸省即日而明母喪哀毀廬墓間頗有徵祥孝感如是由此顯名尋遊方訪道復詣五洩山遇靈默大師一言辨析旨趣符合顯晦之道日月之所然也會昌大中衰而復盛唯與居之熒不能惑焚不能熱溺不能濡者也洎周洛再構長壽寺敕度居焉時內典焚毀梵夾

煨燼手絹散落實為大藏尋南海楊公收典姑蘇請與
歸于故林以建精舍大中十二年鄞水檀越任景求捨
宅為院迎與居之剡寇求甫率徒二千執兵晝入與瞑
目宴坐色且無撓盜衆皆悸懾叩頭謝過寇平州奏請
改額為棲心寺以旌與之德焉凡一動止禪者必集環
堂擁榻堵立雲會與學識泉涌指鑒岐分詰難排縱之
衆攻堅索隱之士皆立褰苦霧坐泮堅冰一言入神永
破沈惑以咸通七年秋八月三日現疾告終享年七十

七僧臘五十七預命香水剃髮謂弟子曰吾七日在矣
及期而滅門人號慕乃權窆天童巖已周三載一日異
香凝空遠近郁烈弟子相謂曰昔師囑累令三載後當
焚我身今異香若此乃發塔視之儼若平生以其年八
月三日依西域法焚之獲舍利數千粒其色紅翠十三
年弟子戒休賣舍利述行狀詣闕請謚奉敕褒誅易名
曰心鑑塔曰壽相與在洛下長壽寺謂衆曰昔四明天
童山僧曇粹是吾前生也有墳塔存焉相去遼遠人有

疑者及追驗事實皆如其言初任生將迎與人或難之
對曰治宅之始有異僧令大其門二十年之後當有聖
者居之比與至止果二十年矣又與將離姑蘇為徒衆
留擁乃以機拂與之曰吾在此矣汝何疑焉暨乎潛行
衆方諭其深旨又令寺之西北隅可為五百墩以鎮之
或曰力何可致與曰不然作一墩植五株栢可也凡微
言奧旨皆此類也刺史崔琪撰塔碑金華縣尉邵朗題
額焉

唐真定府臨濟院義玄傳

釋義玄俗姓邢曹州南華人也參學諸方不憚艱苦因見黃檗山運禪師鳴啄同時了然通徹乃北歸鄉土俯徇趙人之請住子城南臨濟焉罷唱經論之徒皆親堂室示人心要頗與德山相類以咸通七年丙戌歲四月十日示滅敕謚慧照大師塔號澄虛言教頗行于世今恒陽號臨濟禪宗焉

唐洛京廣愛寺從諫傳

鑒宗

釋從諫姓張氏本南陽人也徙居廣陵生于淮甸焉為性倜儻器宇崇峙於閭里間為時畏服遇相工曰子身長八尺眉目秀朗他日必荷榮寄諫曰心不願仕於榮寄何有相工曰所寄荷不可測也越壯室之年忽深信佛理遂捨妻孥求僧披剃焉甫登戒地頗護心珠因悟禪那頓了玄理方數十載同好之者自遠而來請問諫一一指訂俾其開覺尋遊洛下廣愛寺挂錫時禪客鱗集如孝子之事父母焉洛中有請諫設食必排位對賓

頭盧尊者其為人之欽奉皆此類矣屬會昌四年詔廢
佛塔廟令沙門復桑梓亦例澄汰乃烏帽麻衣潛于皇
甫氏之溫泉別業後岡上喬木駢鬱巨石砥平諫於夏
中常就此入定或補毳事忽遇頽雲駛雨霆電擊石烈
風兼至凡在此者驚奔恐懼諫唯欣然加趺而坐若無
所聞者或問諫曰惡畜生何爾大中初宣皇詔興釋氏
諫還歸洛邑舊居其子一日自廣陵來覲適與諫遇於
院門威貌嚴莊不復可識乃問曰從諫大德所居諫指

之東南可尋其子既去遂闔門不出其割裂愛網又若
此也咸通七年丙戌歲夏五月忽出詣檀越家辭別曰
善建福業貧道秋初當遠行故相聞耳至秋七月朔旦
旦盥手焚香念慈氏如來已右脇而卧呼門人玄章誠
之曰人身難得而易失急急於物無心無為流轉無生
滅法一切現存今乃生也有涯暫與爾別是日無疾而
化行年八十餘矣玄章等奉遺旨送屍于建春門外尸
陀林中施諸鳥獸三日復視之肌貌如生一無近者遂

以餅餌覆之經宿有狐狼迹唯啖所覆身且儼如乃議
用外國法焚之收合餘燼起白塔于道傍人尤歸信香
火不絕焉次有杭州徑山院釋鑒宗湖州長城人也姓
錢氏即禮部侍郎徽之孫父晟有疾宗割股肉饋啖之
紹云他畜之肉未幾病間孝譽聞于親里乃求出家時
州開元寺有上都臨壇十望大德內供奉高閑閑善草
隸嘗對懿宗御前書甚高華望宗誓禮為師後出學涉
通淨名思益經遂常講習閑公亦示其筆法漸得鳳毛

焉條往謁鹽官悟空大師隨衆叅請頓徹心源却復故鄉勸人營福咸通三年辛巳巡歷名山遂止天目東峰徑山焉道俗歸心恢揚法教出弟子尤者天童山咸啓敕賜紫衣背山行滿皆分枝化物至七年丙戌閏三月五日示滅遷塔于大寂巖下梁乾化五年吳越國王尚父錢氏表請追謚大師曰無上祖門傳號為徑山第二祖時吳興沈脩者自號白牙先生述德為讚記焉

唐洪州洞山良价傳

釋良价俗姓俞氏會稽諸暨人也少孺從師于五洩山
寺年至二十一方往嵩山具戒焉登即遊方見南泉禪
師深領玄契續造雲巖疑滯頓寢大中末於斯豐山大
行禪法後盛化豫章高安洞山今筠州也价以咸通十
年己丑三月朔旦命剃髮披衣令鳴鐘奄然而往時弟
子輩悲號价忽開目而起曰夫出家之人心不依物是
真脩行勞生息死於悲何有淪喪於情太麤著乎召主
事僧令營齋齋畢吾其逝矣然衆心戀慕從延其日至

於七辰食具方備价亦隨齋謂衆曰此齋名愚癡也蓋責其無般若歟及僧唱隨意曰僧家勿事太率臨行之際喧動如斯至八日浴訖端坐而絕春秋六十三法臘四十二敕謚禪師曰悟本塔號慧覺矣

系曰其却留累日古亦有之如价之來去自由者近世一人而已

唐蘓州藏廩傳

釋藏廩俗姓程衢州信安人也幼歲神氣朗暢貌質魁

然元和中告親求出家志不可却直造長沙嶽麓投靈
智律師請事剃染智師察其強願不羣乃攝度之既披
法服尋於武陵開元寺智總律師受具足尸羅當長慶
三年也因聽律範旋窮篇聚語同業曰教門繁廣然有
總門總門之急忽過捨筏遂徧然禪宗遇馬素門下高
足住龍牙山知廩法器異日告之曰蘊界不真佛生非
我子之正本當何所名復從誰得廩一言領會千轍同
歸龍牙曰我法眼不蒙掩矣既遂所求大得安靜却迴

柯山蓋避會昌之搜揚也至大中六年郡牧崔公壽重
之於州龍興寺別構禪室延居之數年壯至嘉禾信士
歸依請留住至德伽藍又往姑蘇時崔公鈞作守此郡
聞廩名久請居南禪院咸通八年浙西廉使周公寶命
住招隱寺其年秋却返嘉禾信士呂京捨別墅造今永
安院時乾符中群寇紛紜禪侶分散廩曰盜終不至此
及期寇從別道行果無所損其先見如此五年十月十
二日滿院陰雲雉鳴烏噪安坐而化弟子號哭却蘇至

六年三月中辰前別衆後終享年八十二僧臘五十六
時澹交為廩作真讚至乾寧中僧神賛進狀乞追謚號
塔名名士吳重裕書碑

唐福州怡山院大安傳

釋大安姓陳氏閩城人也幼年入道頓拂塵蒙元和十
二年敕建州浦城縣乾元寺置兜率壇始全戒足時天
雨桂子及地生朱草刺史元錫手疏其瑞上達冕旒遂
迴御禮詔改鳳棲寺號靈感壇焉安因往洪井路出上

元忽逢一老父曰子往南昌必有所得及咨叅律學夜
聞二僧談論遽了三乘之旨乃以所習付之同人之臨
川見石鞏山慧藏禪師藏之提唱必持弓弩以擬學人
安服拜未興唱曰看箭安神色不撓答對不差石鞏乃
投弩曰幾年射始中半人也矣安遊五臺入龍池沐浴
雖久寢漣漪殊無奮暴雨電之怪觀者驚悚後止為山
禮大圓禪師復證前聞而為量果也時豫章廉使贈太
尉崔貞孝公則魏公之季父深契玄機敦安之道飛疏

召之厥譽愈昌咸通十四年詔宜號延聖大師賜紫袈
裟一副中和二年示疾所止法堂巨梁中折三年癸卯
十月二十二日坐化于怡山丈室春秋九十一臘六十
七續詔贈圓智大師塔號證真安不嘗唾地不處溫房
隨化而衣天雨而浴諮法弟子慧長入關揚安之德故
有追謚也博陵司空相國仰慕前烈遂著文頌德詩人
周朴篤重安時入山致禮焉

唐長沙石霜山慶諸傳

洪謹
令達

釋慶諸俗姓陳廬陵新淦玉笥鄉人也乃祖厥考咸不
為吏清言放蕩焉諸始十三禮紹鑒禪翁為師於洪井
西山剃髮二十三往嵩山受具戒便就東洛學毗柰耶
既知聽制終謂漸宗迴抵南嶽入大瀉山次屆雲巖遇
道吾垂問知意方為二夏之僧得石霜山便議終焉之
志道吾躬至石霜山日勤執侍往還問答語在別錄諸
貌古氣真世無能識時洞山新滅俄為遠方禪侶圍遶
因入深山無人之境結茅宴坐時衆追尋倏有見者皆

號哭交請出為吾曹諸將安往由是晨夕被遊學者扣
擊可無希聲以應之乎如是二十年間堂中老宿長坐
不卧屹若樞杌天下謂之石霜枯木衆是也南方謂之
叢林者翻禪那為功德叢林也為四方清則者無出其
右以光啓四年戊申歲二月己亥示疾終于山院享齡
八十二僧臘五十九越三月十五日葬于寺西北隅二
百許步門弟子等結墳塔作螺髻形夏四月一日廣化
寺釋子處訥追慕往德恐遺美聲命南嶽玄泰纂錄言

行諸方弟子分行其道焉敕謚普會大師塔曰法相次
餘杭徑山院釋洪諲俗姓吳吳興人也年纔十九於開
元寺禮無上大師出家落飾精加佛事罔怠巾緋二十
二遣往嵩嶽會善寺受滿足律儀俾誦比丘戒匝七
日念終遂習毗尼尋傳經講自謂為僧有逸群事業而
歸禮本師曰汝於十二時中將何報答四恩三有諲聞
斯詰憮然失措三日忘食本師却招誘提耳方明本事
如是往還雲巖次為山各為切磋蔚成匠手俄而會昌

中例遭黜退衆人悲泣者惋歎者謹宴如也曰大丈夫
鍾此厄會豈非命也夫何作兒女之情乎時於長沙遇
信士羅晏召居家供施蓋謹執白衣比丘法初無差失
涉于二載若門賓焉大初中除滅法之律乃復厥議還
故鄉西峰院至咸通六年上徑山覲本師明年無上大
師遷神衆請謹嗣其法位始唯百許僧後盈千數于時
四衆共居肅然無過僖宗皇帝賜院額曰乾符鎮國中
和三年仍賜紫袈裟景福二年吳越國王尚父錢氏奏

舉登賜法濟大師光化四年九月二十八日辭衆而卒
雪溪戚長史寫貌武肅王為真讚傳法弟子廬山栖賢
寺寂公臨川義直功臣院令達達於兩浙大行道化卒
謚歸寂大師焉初諲有先見之明武肅王家居石鑑山
及就戍應募為軍諲一見握手屏左右而謂之曰好自
愛他日貴極當與佛法為主後累立戰功為杭牧故奏
署諲師號見必拜跪檀施豐厚異於常數終時執喪禮
念微時之言矣

唐洪州雲居山道膺傳

釋道膺姓王氏薊門玉田人也生而特異神彩朗然處
于童牀崆峒稟氣宿心拔俗爭離火宅之門拭目尋師
遂攝鍛金之子師授經法誦徹復求年偶蹉跎二十五
方於范陽延壽寺受具足戒乃令習聲聞律儀膺歎曰
大丈夫可為桎梏所拘邪由是擁線衲振錫環詣翠微
山問道三載宴居忽覩二使者冠服頗異勉膺曰胡弗
南方參知識邪未幾有僧自豫章至盛稱洞上禪師言

要膺感動神機遂專造焉如是洞上垂接復能領會曾
問曰我聞思大禪師向倭國為王虛耶實耶對曰若是
思師佛亦不作況國王乎自爾洞上印許初住三峰後
就雲居提唱時唐之李鍾氏據有洪井頗委信誠每一
延請入州則預潔甘子堂以禮之乃表于昭宗賜紫袈
裟一副并師號焉都不留意所化之徒寒暑相交不下
一千餘衆牛頭香樹圍遠者皆是梅檀金翅鳥王軒翔
者不齊尺鷃四方饋供千里風從如荆南師成汭遺賫

檀施動盈鉅萬以天復元年辛酉秋示疾至明年正月三日而化焉豫章南平王鍾氏供其喪葬時諸道禪子各衣鄉土所尚者隨靈龕到處列花樹帳幔粉麪之饌謂之卓祭一期凶禮之盛勿過于時也猗歟膺出世度人滿足三十年遺愛可知也

唐縉雲連雲院有緣傳

釋有緣俗姓馮東川梓潼人也小學之年往成都福感寺事定蘭開士即宣宗師矣隨侍出入多在內中一旦

宣召帝以筆書其衫背云此童子與朕有緣由茲名體
矣大中九年遇白公敏中出鎮益部開戒壇即於淨衆
寺具尸羅也續於京輦聽習經律五臘後身披布褐手
執墨敕海內遊行叅見小馬神照凡同時叢林禪祖無
不禮謁者乃居除州華山及南遊至武夷山時廉使李
誨為築禪室乾符三年至縉雲龍泉大賽山立院因奏
祠部給額號龍安敕度七僧住十八載安而能遽止連
雲院焉太守盧約者以謫諒之誠請入州開元寺別院

四事供施焉天祐丁卯歲四月八日示疾至六月朔日
終于解署報齡七十三臘五十二遺旨囑制置揚習司
空主喪務於寺南園荼毗火滅散分舍利數百粒後收
四十九粒并遺骨一餅瘞于石塔晉開運三年乙巳歲
文泰律師撰塔碑焉

唐福州雪峰廣福院義存傳

釋義存長慶二年壬寅生于泉州南安縣曾氏自王父
而下皆友僧親佛清淨謹愿存生而鼻逆葷血乳抱中

或聞鐘磬或見僧像其容必動以是別垂愛於膝下九
歲請出家怒而未允十二從家君遊蒲田玉潤寺有律
師慶玄持行高潔遽拜之曰我師也遂留為童侍焉十
七落髮來謁芙蓉山恒照大師見而奇之故止其所至
宣宗中興釋氏其道也涅而不緇其身也衰然而出北
遊吳楚梁宋燕秦受具足戒於幽州寶刹寺訖巡名山
扣諸禪宗突兀飄飄雲翔鳥逝爰及武陵一面德山止
於珍重而出其徒數百咸莫測之德山曰斯無階也吾

得之矣咸通六年歸于芙蓉之故山其年圓寂大師亦

自為山擁徒至于怡山王真君上昇之地其徒孰

孰師已嗣

德山累累而疑闕存拒而久之則有行實者始以存同而

議曰我之道巍巍乎法門圍遠之所不可造次其地宜

若布金之形勝可矣府之西二百里有山焉環控四邑

峭拔萬仞嵒崿以支圓碧培塿以覩群青怪石古松棲

蟄龜鶴靈湫邃壑隱見龍雷山之巔先冬而雪盛夏而

寒其樹皆別垂藤蘿芊茸而以為之衣交錯而不呈其

形竒姿異景不可殫狀雖霍童武夷無以加之竇閩越之神秀而古仙之未攸居誠有待於我也所以偕行去秋七月穿雲躡薛陟險昇幽將及之存曰真吾居也其夕山之神果効靈翌日巖谷爽朗煙霞飛動雲庵既立月構旋隆繇是祝法輪於無為樹空門於有地行實乃請名其山曰雪峰以其冬雪夏寒取鷺嶺猴江之義斯則庚寅逮于乙未存以山而道任山以存而名出天下之釋子不計華夏趨之若召乾符中觀察使京兆韋公

中和司空潁川陳公每渴醖酬而不克就飲交使馳
懇存為之入府從人願也其時內官有復命于京語其
道其儕之拔俗悟空者請蛻浮華而來脫屣僖宗皇帝
聞之翰林學士訪於閩人陳延効得其實奏於是乃錫
真覺大師之號仍以紫袈裟俾延効授焉存受之如不
受衣之如不衣居累夏辛亥歲朔遽然杖屨其徒啟而
不答雲以隨之東浮于丹丘四明明年屬王侍中之始
據閩越乃洗兵於法雨致禮於禪林馥存之道常東望

頂手後二年自吳還閩大加禮異及閩王王氏誓衆養
民之外雅隆其道凡齋僧構刹必請問焉為之增宇設
像鑄鐘以嚴其山優施以充其衆時則迎而館之于府
之東西甲第每將儼油幢聆法論未嘗不移時僅乎一
紀勤勤懇懇熊羆之士因之投跡檀那漁獵之逸其或
謂心鱗羽戊辰年春三月示疾閩王走醫醫至粒藥以
授存曰吾非疾也不可罔子之工卒不餌之其後札偈
以遺法子函翰以別王庭夏五月二日鳥獸悲鳴雲木

慘悴其夜十有八刻時滅度俗壽八十有七僧臘五十有九以其月十五日塔而藏之爾日奔走閩之僧尼士庶巷無居人閩王漣如出涕且曰師其捨予一何遽乎遣子延稟躬祭奠之復齋僧焉存之行化四十餘年四方之僧爭趨法席者不可勝筭矣冬夏不減一千五百徒之環足其趨也馳而愈離辯而愈惑其庶幾者一曰師備擁徒于玄沙今安國也次曰可休擁徒于越州洞巖次曰智孚擁徒于信州鵝湖其四曰惠稜擁徒于泉州招

慶其五曰神晏住福州之鼓山分燈化物皆膺聖獎賜紫袈裟而玄沙紹宗一大師焉

系曰雪峰道也恢廓乎駿奔四海學人所出門生形色不類何邪玄沙乘楞嚴而入道識見天殊其猶諺曰青成藍藍謝青師何常在明經故有過師之說一則雪峰自述塔銘已盡其致也一則玄沙安立三句決擇羣見極成洞過歟今江表多尚斯學此學虛通無繫了達逍遙勿拘知乘急也雪峰化衆切乎杜嘿禪坐知戒急也

其能各捨一緩以成一全則可乎

唐澧州蘓溪元安傳

釋元安俗姓淡鳳翔麟遊人也壯年於岐陽懷恩寺從兄祐律師出家唯經與論無不窮核乃問道翠微次臨濟各飡法味若飫香積之盂也斲彫復朴逍遙自如聞夾山道盛德至造澧陽當稽問轆轤又增明淨後開樂普山尋居蘇溪答訓請益多偶句華美為四海傳焉以昭宗光化元年戊午十二月遷滅享壽六十五法臘四

十六矣臨終告衆頗多警策辭句云

唐明州雪竇院恒通傳

招賢
岑師

釋恒通俗姓李邢州平恩人也家傳士族幼而知學蘇秦顯達猶懷二頃之田元亮孤高不羨五斗之祿縱越挨天擲地拖紫腰金瞬息浮華豈裨來業父母終禮年甫十三潛入鵲山訪道依師既罷丘墳唯披釋典精虔懺誦懇侍巾瓶不弭初終蒙恩剃度年二十於本州開元寺具戒後往京兆薦福寺聽習經律七八年間尋窮

藏教乃曰摩騰入漢譯著斯文聖胄來梁復明何事因
辭北闕逕詣南方遇招賢岑大師大師問曰何處人也
曰邢州人也招賢曰我道不從彼來通曰和尚還住此
無於是有滯皆伸無疑不決後指洞山石霜皆往叅焉
招賢示滅通以弟子禮事之咸通末遊宣城尚書崔寓
素奉禪門攀迎莊肅覩通儀表拔俗問答往還崔甚悅
服於謝仙山奏置禪院號瑞聖請以居之四方毳衲之
徒不邀自聚博陵方議奏薦師號堅讓遂寢中和末文

德初羣寇競起通領徒至四明大順二年郡牧黃君晟
請留居雪竇焉蔚然盛化天祐二年七月示疾越九日
躬入浴室却坐繩牀集衆焚香勤勤付囑合掌而逝春
秋七十二夏臘五十二以其年八月七日遷石塔于院
之西南二百餘步或曰通臨終言我龐勛也此非也高
僧無作為行錄而無此說若觀年臘龐勛宣正弱冠來
逃難邪

唐袁州仰山慧寂傳

釋慧寂俗姓葉韶州須昌人也登年十五懇請出家父母都不聽允止十七再求堂親猶豫未決其夜有白光二道從曹溪發來直貫其舍時父母乃悟是子至誠之所感也寂乃斷左無名指及小指器藉跪致堂階曰答謝劬勞如此父母知其不可留捨之依南華寺通禪師下削染年及十八尚為息慈營持道具行尋知識先見耽源數年良有所得後參大瀉山禪師提誘哀之棲泊十四五載而足跋時號跛脚驅烏凡於商榷多示其相時

韋胄就寂請伽陀乃將紙畫規圓相圓圍下注云思而知之落第二頭云不思而知落第三首乃封呈達自爾有若干勢以示學人謂之仰山門風也海衆摳衣得道者不可勝計往往有神異之者條來忽去人皆不測後敕追謚大師曰智通塔號妙光矣今傳仰山法示成圖相行于代也

唐天台紫凝山慧恭傳

釋慧恭俗姓羅氏福州閩人也家傳儒素不交非類母

姪之初夢所居湧出浮圖上叅于天迨恭誕生嶷然聰
悟年十七舉進士名隨計車將到京闕因遊終南山奉
日寺目祖師遺像釋然世網遂求出家操執僧事備歷
艱辛二十有二適值新創安國寺受具足戒尋乃遊方
緣嶮涉荒而無難色嘗遇黑蛇傷指不求醫而毒螫自
銷見魑魅占山諭罪福而妖物遄息至武陵德山詣宣
鑒禪師領會風飛由茲道合因挂錫施門人禮鑒公順
世後遊玉山至信州刺史營西禪院而禮之其徒數百

人居歲餘以郭郭喧繁復入福州長溪馬冠山自馬冠
抵泉州富陽山所至之所檀施臻集徒侶解鉢禪坊立
就其為士庶嚮奉如此景福三年與門人遊天台州牧
京兆杜雄留之而止杜因創瑞龍院於紫凝山祈恭興
揚法席以悟淪迷緇俗雲馳香花山積天復三年癸亥
十二月午時命衆聲鐘顧瞻左右促言云去加趺瞑目
儼然而化春秋八十四僧夏六十二闡圓頓之宗居道
德之最歿無易名塔無題榜足見浮名為桎梏耳門人

上足師遂植松負土力崇塔廟所謂法空不壞因緣矣
因緣有之孝行曷傷于道云

唐杭州龍泉院文喜傳

釋文喜姓朱氏嘉禾禦兒人也母氏方娠夢吞桃三蒂
至誕彌不味葷羶七歲詣本邑常樂寺僧清國下出家
國即喜之渭陽也勒誦經并懺又十卷方遂削染往越
州開元寺學法華經集天台文句即時敷演則救燄分
中便能講訓也開成二年屆趙郡受近圓登習四分律

屬會昌澄汰變素服內祕之心無改遇大中初年例重
懺度於鹽官齊豐寺講說後往禮大慈山性空禪師誨
之曰子何不學善財徧叅乎咸通壬午歲至豫章觀音
院見仰山喜於言下了其心契仰山令典常住一日有
異貌僧就求齋食喜減已食饋之仰山預知故問曰此
果位僧求食汝供給周旋否答曰輟已分迴施曰汝大
得利益七年旋浙右止千頃山築室居之十年餘杭劉
嚴合馬徵請居龍泉古城院凡十一年乾符己亥歲巢

寇掠地至餘杭喜避地湖州餘不亭刺史杜孺休請住
仁王院光啟三年武肅王錢氏始牧杭郡降疏請住龍
泉廨署今慈光院是大順元年威勝軍節使董昌武
肅王同年發表薦論兩賜紫衣乾寧四年奏師號曰無
著光化三年示疾十月二十七日加趺坐而終于州郭
廨署春秋八十僧夏六十終時方丈上發白色光竹樹
變白十一月二十二日遷塔于靈隱山西塢喜形貌古
朴骨強而瘦戒德禪門真知識也初喜寓居雪川廣明

元年夏有蝗飛翳天下食田苗喜自將拄杖懸挂袈裟
標于畎澮中其蟲將下遂厲聲叱之悉翻飛而去十頃
之苗斯年獨稔其感通如此或云所傳得事祖細衲裟
裝以為信寶矣遷葬之後天復二年壬戌八月中宣城
帥田頔應杭將計思叛渙縱兵大掠發喜塔見肉身不
壞如入禪定髮爪俱長武肅王奇之遣裨將邵志祭後
重封瘞焉

唐明州伏龍山惟靖傳

釋惟靖吳門人也年三十許形奇貌古且類憨癡入國寧寺巡僧房唱曰要人出家請留下至經藏院見二衆闍黎大德慧政便跪拜伸誠願容執侍政公允納與翦飾於天台受具暫歸謝政便尋訪名山有知識處必經寒燠自爾勤於禪法未嘗發言即居定光禪師廢金地道場侵星赴禪林寺晨粥而多虎豹隨到寺門虎踞地若伺候靖出復隨至金地遲明巨迹極多靖恐人知以鋤滅虎跡俄患背疽因睡有鵝鳥糞于瘡所非久全愈

又虞氷雪備粳粒半斗每日以鈔合菜煮食實粳於地窖中過期用米常滿不耗靖乃築之而云吾被此物知非理也尋居伏龍山山可瞰海峰勢宮堯昔僧鑒諸曾隱于是諸即唐王相國之母弟也能文習道刺史多往謁之靖續遁此山刺史黃晟常請出州供施繁委末於奉川北山置院示疾坐終享齡七十餘窆于山下瑩塔存焉

欽定四庫全書

宋高僧傳
卷十二

宋高僧傳卷十二

欽定四庫全書

宋高僧傳卷十三

宋 釋贊寧 撰

習禪篇第三之六

正傳十七人
附見六人

唐東京封禪寺圓紹傳

釋圓紹姓孫氏其先富陽人也祖官于南燕因為滑臺
白馬人焉年及識環天然俊邁鄰兒戲玩我且恬然羣
從追隨我惟閒靜年當十八方遂志出家師事明福寺

正覺禪師覺見而異之訓諸徒弟獨許紹耳曰真空門之偉器也至年二十二於相州義檀香燈律師邊受具登即尋師訪道效祖參玄二翼之餘一盂之外必無他物唯誓禪宗立雪傳衣是其素望也至于三湘五嶺二蜀兩京凡曰叢林一皆叅禮既探至謁頓了心機乃挂錫於夷門即倉垣水南寺今為開寶也大中十年適遇唐相國裴公休罷調商鼎來鎮魏郊同氣相求一言道合即命居今東上方院也紹將聚禪徒患其迫窄遂開

上院之西損上益下時檀施臻萃脩成巨院擁納之流
數盈二百橫跨夷門山之峻嶺焉紹即七祖荷澤神會
禪師五葉法孫也演其無念示以真心了達磨之密傳
極南能之深趣時叅學之衆擁從且繁遇元帥相國王
晉公鐸以紹道行通感神祇効靈降甘露於玄穹泣嘉
瑞於青檜奏僖宗賜院額曰雙林師號曰法濟別勅令
度侍者七人其間法會興盛士庶歸心僅四十載所化
人可萬計僧尼弟子五百餘人以乾寧二年乙卯七月

四日謂衆曰急急自了去本為逃生死若不解玄旨何時得脫吾景逼崦嵫此為最後之言也於方丈中寂然而化俗壽八十五法臘六十三勅許於本院西南隅建塔焉越五年二月二日重開塔髮長半寸儀貌如生乃以香華供養七日遠近瞻禮稱歎希奇已而行荼毗火中迥出五色神光收舍利百餘粒四散隨心淘選近千粒溫潤玉潔璨爛珠圓驗五分之熏成匪一生之構集四衆虔仰復迎入塔即昭宗皇帝戊午歲也睢陽相國

袁象先理于浚郊弟子惠靄等冀終法乳列狀乞舉行
謚禮梁乾化三年癸酉太祖勅易名曰定覺塔曰靈化
至貞明四年九月惠靄等欲旌表師德立碑勅允開封
尹王公瓚之文也

唐蘄州黃崗山法普傳

休靜

釋法普姓潘氏廬江人也貌古情寬擁敗納觀方元和中
因見黃崗山色奇秀其峰巉崿其林鬱密中有石壇
平坦而高峙乃放囊挂錫于中班荆久之尋附樹架蓬

次僅容身而已未幾有人自小徑而至見普驚怪問云
何緣至此曰某本行山麓見巔頂騰漲紫氣盤紆可愛
意此山有尤物故來耳諦視普遲迴而去山下行者聞
而尋焉禪學之徒不數年遽盈百數普却之曰老僧獨
居無物利人君等亦無所乏由是星居之庵多矣弟子
廣嚴等構成大院禪客翕如傳其法者無算一日集衆
辭云吾其終矣汝曹善住珍惜加趺坐胡床而卒其身
不壞散後以香泥塗續之至乾符中重立碑頌云次洛

京華嚴寺釋休靜不知何許人也屬洞山禪道風行靜
往造之扶槌所疑若雷復于本位焉北返於洛邑開演
因赴內齋諸名公皆執經諷讀唯靜并其徒俱默坐帝
宣問胡不轉經訓答響應仍皆屬對悅可帝情尋迴平
陽示滅收舍利四處樹浮圖勅謚寶智大師塔號無為
也

梁鄧州香嚴山智閑傳

大

釋智閑青州人也身裁七尺博聞強記有幹略親黨觀

其所以謂之曰汝加力學則他後成佐時之良器也俄爾辭親出俗既而慕法心堅至南方禮為山大圓禪師盛會咸推閑為俊敏為山一日召對茫然將諸方語要一時煨燼曰畫餅弗可充飢也使望南陽忠國師遺跡而居偶芟除草木擊瓦礫失笑冥有所證抒頌唱之由茲盛化終後勅謚襲燈大師塔號延福焉次舒州桐城投子山釋大同姓劉氏舒州懷寧人也幼性剛正有老成氣度因投洛下保唐滿禪師出俗初習安般觀業垂

成遂求華嚴性海復負錫謁翠微山法會同伏牛元通
激發請益大明祖意由是放蕩周遊還歸故土隱投子
山結茅茨棲泊以求其志中和中巢寇蕩履京畿天下
悖亂有賊徒持刃問同曰住此何為對以佛法魁渠聞
而膜拜脫身服裝而施之下山以梁乾化四年甲戌四
月六日加趺坐亡春秋九十六法臘四十六凡居化此
山三十餘載云

梁撫州疎山光仁傳

本仁
居遁

釋光仁不知何許人也其形矬而么麼幼則氣槩凌物
精爽殆與常不同早叅洞山深入玄奧其辯給又多於
人也嘗問香嚴禪師答微有偏負曰某累謫重貶而至
得無勞乎唾地而去後居臨川疎山毳客趨請頗有言
辭著四大等頌略華嚴長者論行于世終入龕中已有
白鹿至靈前屈膝而起時衆謂為作弔焉次筠州白水
院釋本仁不知何許人也得心於洞山法席仁罕談道
而四方之人若影之附形却之還至乃徇丹陽人請住

無幾時天復中至洪井高安白水院聚徒垂欲入滅先
觸處告違乃集衆焚香曰至香煙盡處是某涅槃時如
其言端坐而化次龍牙山釋居遁姓郭氏臨川南城人
也年殆十四警世無常而守恬淡白親往求出家于廬
陵滿田寺於嵩山受具戒已思其擇木乃叅翠微禪會
迷復未歸莫知投詣聞洞上言玄格峻而躬造之遁少
進問曰何謂祖意答曰若洞水逆流即當為說而於言
下體解玄微隱衆栖息七八年間孜孜戢曜時不我知

久則通矣天策府楚王馬氏素藉芳音奉之若孝悌之
門稟昆長矣乃請居龍牙山妙濟禪院僦僦徒侶常聚
半千爰奏舉詔賜紫袈裟并師號證空焉則梁貞明初
也方嶽之下號為禪窟閱其室得其門者亦相繼矣至
龍德三年癸未歲八月邁疾彌留九月十三日歸寂遁
出世近四十餘齡語詳別錄

梁福州玄沙院師備傳

釋師備俗姓謝閩人也少而憨黠酷好垂釣往往泛小

艇南臺江自娛其舟若虛同類不我測也一日忽發出
塵意投釣棄舟上芙蓉山出家咸通初年也後於豫章
開元寺具戒還歸故里山門力役無不率先布衲添麻
芒屨續草減食而食語默有常人咸畏之汪汪大度雖
研桑巧計不能量也備同學法兄則雪峰存師也一再
相逢存多許與故目之為備頭陀焉有日謔之曰頭陀
何不徧叅去備對曰達磨不來東土二祖不往西天存
深器重之先開荒雪峯備多率力王氏始有闍土奏賜

紫衣號宗一大師以開平二年戊辰十一月二十七日
示疾而終春秋七十四僧臘四十四閩越忠懿王王氏
樹塔備三十年演化禪侶七百許人得其法者衆推桂
琛為神足矣至今浙之左右山門盛傳此宗法嗣繁衍
矣其於建立透過大乘初門江表學人無不乘風偃草
歟

梁河中府棲巖山存壽傳

釋存壽不知何許人也清標勝範造次奚及罷尋經論

勇冠輩流往問津於石霜禪師決了前疑虛舟不繫乃
為枯木衆之樞杌矣後還蒲坂緇素歸心時冀王友謙
受封屏翰好奇徇異聞人一善厚禮下之王召入府齋
論道談玄不覺膝之前席頗增奉仰續為菩薩戒師供
施更蕃度門人四百許員尼衆百數壽平日罕言言必
利物喜愠之色人未嘗見望之若孤松凌雪焉終時春
秋九十三加趺而坐一月後髭髮再生重剃入塔塔之
亭每有虎旋遶風跡時繁勅謚為真寂大師焉

梁台州瑞巖院師彥傳

釋師彥姓許氏閩越人也早悟羈縻忽求拔俗循乎戒檢俄欲觀方見巖頭禪師領會無疑初樂杜默似不能言者後為所知敦喻允請住台州瑞巖山院時道忞往叅問答對響捷忞公神伏後二衆同居彥之威德凜若嚴霜糾正僧尼無容舛悟故江表言御衆翦齊者瑞巖為最嘗有三僧胡形清峭目睛轉若流電焉差肩竝足致禮彥問曰子從何來曰天竺來何時發曰朝行適至

彥曰得無勞乎曰為法忘勞乃諦視之足皆不蹈地彥
令入堂上位安置明旦忽焉不見云是辟支迦果人然
莫知階級時有不測人入法會非止一過彥叅學時號
為小彥長老兩浙武肅王錢氏累召方肯來儀終苦辭
去寺倉常滿嘗有村媪來叅禮彥曰汝休拜跪不如疾
歸家救取數十百物命大冇利益媪忿忙到舍兒婦提
竹器拾田螺正歸媪接取放諸水濱又數家召齋一一
同日見彥來食至終闍維有巨蛇緣樹杪投身火聚當

乎薪盡舍利散飛或風動草木上紛紛而墜神異絕繁
具如別錄

梁撫州曹山本寂傳

釋本寂姓黃氏泉州蒲田人也其邑唐季多衣冠士子
僞寓儒風振起號小稷下焉寂少染魯風率多強學自
爾淳粹獨凝道性天發年惟十九二親始聽出家入福
州雲名山年二十五登于戒足凡諸舉措若老苾蒭咸
通之初禪宗興盛風起於大瀉也至如石頭藥山其名

寢頓會同山憫物高其石頭往來請益學同洙泗寂處
衆如愚發言若訥後被請住臨川曹山叅問之者堂盈
室滿其所訓對激射匪停特為毳客標準故排五位以
銓量區域無不盡其分齊也復注對寒山子詩流行寓
內益以寂素修舉業之優也文辭道麗號富有法才焉
尋示疾終于山春秋六十二僧臘三十七弟子奉龕窆
而樹塔後南嶽玄泰著塔銘云

後唐漳州羅漢院桂琛傳

釋桂琛俗姓李氏常山人也甫作童兒篤求遠俗齋茹
一餐調息終日秉心唯確鄉黨所欽二親愛縛而莫辭
羣從情纏而難脫既冠繼踰城之武求師得解虎之儔
乃事本府萬歲寺無相大師矣初登戒地例學毘尼為
衆升臺宣戒本畢將知志大安拘之於小道乎乃自誨
曰持犯束身非解脫也依文作解豈發聖乎於是誓訪
南宗程僅萬里初謁雲居後詣雪峯玄沙兩會叅訊勤
恪良以嗣緣有在得旨於宗一大師明暗色空廓然無

感密行累載處衆韜藏雖夜光所潛而寶器終異遂為
故漳牧太原王公誠請於閩城西石山建蓮宮而止駐
錫一紀有半來往二百衆琛以秘重妙法固輕示徒有
密學懇求者時為開演後龍溪為軍倅勤州太保瑯琊
公志請於羅漢院為衆宣法諱讓不獲遂開方便不數
載南北叅徒喪疑而往者不可殫數有角立者撫州曹
山文益江州東禪休復咸傳琛旨各為一方法眼視其
子則知其父矣以天成三年戊子秋復戒閩城舊止徧

翫近城梵宇已俄示疾數日安坐告終春秋六十有二
僧臘四十遺戒勿遵俗禮而棺而墓於是荼毘於城西
院之東崗收其舍利建塔于院之西稟遺教也則清泰
二年十二月望日也琛得法密付授耳時神晏大師王
氏所重以言事脅令捨玄沙嗣雪峰確乎不拔終為晏
讒而凌輔惜哉

後唐福州長慶院慧稜傳

釋慧稜杭州海鹽人也俗姓孫氏初誕纏紫色胎衣為

童胤日俊朗抗節於吳苑通玄寺登戒已聞南方有禪
學遂遊閩嶺謁雪峰提耳指訂頓明本性乃述偈云昔
時謾向途中學今日看來火裏冰如是親依不下峰頂
計三十許載冥循定業謹攝矜莊泉州刺史王延彬召
稜住昭慶院禪子委輸唯虞後至及於長樂府居長慶
院二十餘年出世不減一千五百衆稜性地慈忍不安
許人能反三隅方加印可以長興三年壬辰五月十七
日長往春秋七十九僧臘六十閩國王氏私誄之大師

號超覺塔塋皆出官供判官林文盛為碑紀德云

後唐杭州龍冊寺道愆傳

釋道愆俗姓陳永嘉人也卅總之年性殊常準而惡鯨
血之氣親黨強啖以枯魚且虞嘔噦求出家於開元寺
具戒已遊閩入楚言叅問善知識要決了生死根源見
臨川曹山寂公大有徵詰若曇詢之問僧稠也終頓息
疑於雪峰閩中謂之小愆布納時太原同名年臘之高
故暨迴浙住越州鑑清院時皮光業者日休之子辭學

宏瞻探蹟禪門嘗深擊難焉退而謂人曰愆公之道崇
論閎議莫臻其極武肅王錢氏欽慕命居天龍寺私署
順德大師次文穆王錢氏創龍冊寺請愆居之吳越禪
學自此而興以天福丁酉歲八月示滅春秋七十荼毘
于大慈山塢收拾舍利起塔於龍姥山前故僧主彙征
撰塔銘令舍利院弟子主之香火相綴焉

晉會稽清化院全付傳

釋全付吳郡崑山人也幼隨父商於豫章聞禪寂之說

乃有厭世之志白求出家父愠形於色愠止復白者三
父異其誠率略許之遂詣江夏投清平大師問曰爾何
來何求付曰志求法也清平師憐其幼而抱器撫以納
之夙興夜寐殊於羣童及長為之落飾尋登戒度奉師
彌謹檢身彌至問法無厭飫見性不齷齪清平頷而許
之一旦謂人曰吾聞學無常師吾非匏瓜豈繫于此而
曠于彼乎遂辭師而抵宜春之仰山禮南塔涌禪師應
對言語深認仰山之勢頓了直下之心仰山默然器重

之拳拳伏膺棲神累載後遊于廬陵安福縣宰楊公建
應國禪院請付居之禪徒子來堂室畧滿楊宰罷任其
鄉人復於鵠湖山建院迎以居之廉使上聞錫名曰清
化禪院禪徒麇至請問者牆進皆不我屈豈多讓于前
輩乎有同里僧謂付曰父母之鄉胡可棄也任緣徇世
願師歸歟遂別鵠湖而還故國時吳越文穆王錢氏命
升階賜之衣衾鉢器有加禮焉丁酉歲錢城戍將闢雲
峯山建清化禪院召以居之次忠獻王錢氏遣使錫以

紫袈裟付上章累讓再賜之又讓之遂故以納衣付曰
吾非榮其賜而飾讓也恐後人之倣吾而逞欲矣尋賜
號曰純一禪師又固讓之付不以情忘情故情真不以
道求道故道直所居院之殿宇堂室人競崇建之鑄鐘
千餘斤新額曰雲峰清化禪院雲水之侶輻湊睽睽不
欲捨旃開運四年丁未歲秋七月示疾謂衆曰生也法
起歿也法滅起滅非言論所及也安然而逝有大雨疾
風以震林木拔矣享年六十六臘四十有五歸窆於山

之北塢弟子應清等十餘人奉師遺訓不墜其道焉僧
主景征為塔銘建隆二年立

晉永興永安院善靜傳

靈照

釋善靜俗姓王氏長安金城人也父朗唐威州刺史母
李氏因夢聖容照爛金色遂爾娠焉及生岐嶷殆乎知
學博通羣言因掌書奏于神策軍中尉器重之忽厭浮
幻潛詣終南豐德寺禮廣度禪師時年二十七也泊乎
剏染受具天復中南遊樂普見元安禪喬乃融心要北

還化徙于故里結廬于終南雲居山道俗歸之如市又
起遊峨嵋禮普賢銀色世界迴興元連帥王公禮重留
之後還故鄉已黍離矣留守王公營永安禪院以居之
以開運丙午歲冬鳴椎集僧囑累還方丈東向右脇而
化俗壽八十九僧臘六十黑白之衆若喪嚴親明年正
月八日茶毘於城南獲舍利數千粒漢乾祐三年庚戌
八月八日遷塔于長安義陽鄉石塔巋然初靜率多先
覺往遊憩道避昭宗之蒙塵又生平洗沐舍利隕落皆

收秘不許弟子示人又嘗禪寂次牕外無何有白鶴馴狎于庭若有聽法之意靜令人驅斥之凡此殊徵有而不有晉昌軍府主郭公歸信焉營構禪院命以居之翰林學士魚崇諒為塔銘述德焉次杭州龍華寺釋靈照本高麗國人也重譯而來學其祖法入乎閩越得心於雪峯苦志叅陪以節儉勤于衆務號照布納焉千衆畏服而言語似涉島夷性介特以恬淡自持初住齊雲山次居越州鑑清院嘗祇對副使皮光業語不相投被舉

擯徙龍興焉及湖州太守錢公造報慈院請住禪徒翁然吳會間僧捨三衣披五納者不可勝計忠獻王錢氏造龍華寺迎取金華梁傳翕大士靈骨道具寘于此寺樹塔命照住持焉終于此寺遷塔大慈山之峰

周金陵清涼文益傳

釋文益姓魯氏餘杭人也年甫七齡挺然出俗削染于新定智通院依全偉禪伯弱年得形俱無作法於越州開元寺于時謝俗累以拂衣出樊籠而矯翼屬律匠希

覺師盛化其徒于鄮山育王寺甚得持犯之趣又遊文
雅之場覺師許命為我門之游夏也尋則玄機一發雜
務俱損振錫南遊止長慶禪師法會已決疑滯更約伴
西出湖湘爾日暴雨不進暫望西院寄度信宿避溪漲
之患耳遂叅宣法大師曾住漳浦羅漢闍人止呼羅漢
羅漢素知益在長慶穎脫銳意接之唱導之由玄沙與
雪峰血脈殊異益疑山頓摧正路斯得欣然挂囊栖
止變塗迴軌確乎不拔尋遊方却抵臨川邦伯命居崇

壽四遠之僧求益者不減千計江南國主李氏始祖知
重迎住報恩禪院署號淨慧厥後微言欲絕大夢誰醒
既傳法而有歸亦同凡而示滅以周顯德五年戊午歲
秋七月十七日有恙國主紆于方丈問疾閏月五日剃
髮澡身與衆言別加趺而盡顏貌如生俗年七十四臘
五十五私謚曰大法眼塔號無相俾城下僧寺具威儀
禮迎引奉全身於江寧縣丹陽鄉起塔焉益好為文筆
特慕支湯之體時作偈頌真讚別形纂錄法嗣弟子天

台德韶慧明漳州智依鐘山道欽潤州光逸吉州文遂
江南後主為碑頌德韓熙載撰塔銘云

周廬山佛手巖行因傳

道潛

釋行因不詳姓氏鴈門人也遊方問道于江淮見廬山
北有巖遙望如垂手焉手下則深邃可三五丈許因獨
棲禪觀于其中偽唐主元宗聞之三徵召不起巖中夜
闌有異鹿一卧于因之石屋之側又錦囊鳥一伏宿于
石壁下二物都無驚怖因不度弟子有隣庵僧為之供

侍一日小疾謂侍僧曰卷上簾我去去簾方就鉤下牀
三數步間立屹然而化春秋七十許元宗命畫工寫真
而閣維收遺骨白塔在巖背焉初因傳禪法于襄陽鹿
門山尋為元宗堅請於棲賢寺開堂唱道不及朞月潛
歸巖窟初巖如五指中指上有松一株因終之日此亦
枯瘁因有經籍之學有問則指摘先儒得失章句是非
談論不滯於方隅開喻必含於教化實得道之良士也
系曰凡夫捨報尸必一同也佛則右脇果位坐亡首揩

地者現通身立中者彰異其惟欲行步而化者除後僧
會外則因公有焉

次錢塘慧日永明寺釋道潛俗姓武蒲津人也生而強
壯容姿端雅成立則身長七尺許胸前黑子七點若斗
之網魁焉投中條山棲巖大通禪院禮真寂禪師為親
教也戒檢嚴明訥言敏行師亡之後誓入鴈門五臺山
以精恪之故躬覩文殊聖容後諸方無定遊處未到臨
川見崇壽益禪師頓明心決次棲衢州古寺覽閱藏經

嘗晏坐中見文殊現形不覺起而作禮及詣杭禮阿育王塔跪而頂戴淚下如雨問掌塔僧曰舍利人不目擊還實有否僧曰按傳記云藏在內角中望若懸鐘焉潛疑未已遂苦到跪禮更無間然俄見舍利紅色在懸鐘之外蠢瞶而行潛悲喜交集又光文大師彙征迴然肯重自為檀越請於山齋行三七日普賢懺忽見徧吉御象在塔寺三門亭下其象鼻直枕行懺所漢南國王錢氏命入王府受菩薩戒造大伽藍號慧日永明請以居

之假號曰慈化定慧禪師別給月俸以施之加優禮也
建隆二年辛酉九月十八日示疾而終入棺之際有白
光晝發字字瑩然時衆皆覩至十月內於龍井山茶毘
所收舍利夥多有屠者自惟惡業展禱就火聚乞求斯
須獲七顆屠家持於印氏塔中至開寶庚午歲天台韶
禪師建石塔緘其真骨癸酉歲塔頂放白光焉

宋廬山圓通院緣德傳

釋緣德俗姓黃錢塘人也父超修學儒術而長於續畫

傳周昉佛粉本受筆法於吳興李沼長史德幼有出家之志心性孤僻而寡合遂往天台受具習禪法於天龍寺道忞禪師尋往江西問道自雲居往廬阜孤節高岸實不見有所欲江南國主李氏召入內道場安置慮其不羣別構羅漢院處之苦求入山請住廬山新院乃列威儀導引焉德且裝衣荷擔而入然後升座對答叅問焉其國主賜賚未嘗以表牋報謝有國老宋齊丘者禮以師道以開寶中卒于山院德一生服用熟韋袴襪而

已行杜多法供億諸禪侶厨無匱乏或謂德有黃白術焉

宋天台山德韶傳

釋德韶者姓陳氏縉雲人也幼出家于本郡登戒後同光中尋訪名山叅見知識屈指不勝其數初發心於投子山和尚後見臨川法眼禪師重了心要遂承嗣焉始入天台山建寺院道場無幾韶大興玄沙法道歸依者衆漢南國王錢氏嘗理丹丘韶有先見之明謂曰他日

為國王當興佛法其言信矣遣使入山旁午後署大禪
師號每有言時無不符合蘇州節使錢仁奉有疾遣人
賣香往乞願焉乃題疏云令公八十一仁奉得之甚喜
曰我壽八十一也其年八月十一日卒焉凡多此類韶
未終之前也華頂石崩振驚百里山如野燒蔓延果應
韶終焚舍利繁多營塔命都僧正贊寧為塔碑焉享年
八十二法臘六十四即開寶五年壬申歲六月二十八
日也語錄大行出弟子傳法百許人其又興智者道場

數十所功成不宰心地坦夷術數尤精利人為上至今
江浙間謂為大和尚焉

論曰梵語禪那華言念修也以其觸情念而無念終日
修而無修又云正定也正受也正則廓然冥而定矣正
受簡邪思惟增徧計故所以奢摩他以寂靜故三摩提
以觀如幻故若禪那者俱離靜幻故始云菩薩不住此
岸不住彼岸而度衆生令登彼岸也若然者諸聖住處
既如彼諸聖度生復若何稽夫法演漢庭極證之名未

著風行廬阜禪那之學始萌佛陀什秦擯而來般若多
晉朝而至時遠公也密傳坐法深幹玄機漸染施行依
違祖述吳之僧會亦示有緣俱未分明肆多隱秘及乎
慧文大士肇尋龍樹之宗思大禪翁繼傳三觀之妙天
台智者引而伸之化導陳隋名題止觀粵有中天達磨
哀我羣生知梵夾之雖傳為名相之所溺認指忘月得
魚執筌但矜誦念以為功不信已躬之是佛是以倡言
曰吾直指人心見性成佛不立文字也此乃乘方便波

羅蜜徑直而度免無量之迂迴焉嗟乎經有曲指曲指
則漸修也見性成佛者頓悟自心本來清淨元無煩惱
無漏智性本自具足此心即佛畢了無異如此修證是
最上乘禪也不立文字者經云不著文字不離文字非
無文字能如是修不見修相也又達磨立法要唯二種
謂理也行也然則直而不迂不速而疾云不立文字乃
反權合道也爾時梁武不知魏人未重向少林而面壁
唯慧可以神交亦猶白雪雖歌巴童寡和後則臨沂牧

園子孫終號於強秦避狄岐邠文武乃成其王道可生
璨璨生信信下分二枝一忍二融融牛頭也忍生秀與
能能傳信衣若諸侯付子孫之分器也厥後此宗越盛
焉陰車百輛尼枸樹而展轉垂枝施雨萬方阿耨龍而
連筵布潤當是時也應其懸記屬于此人後來得道無
央數是歟重之曰夫禪之為物也其大矣哉諸佛得之
昇等妙雌龍得之破障纏率由速疾之門無過此故今
之像末闢諍復生師足既傷資爭未已如聞此心是佛

便言三十二相何無或聞一路涅槃則曰八萬法門何在曾不知經中發菩提心此見佛性也云何修菩薩行此行布修行也因信不及無明所迷弱喪忘歸何由復業或舉經以示之則對曰此性宗法或謂之曰莫是魔說還可焚毀否且置而勿論又欲棄之又欲存之不其惑乎昔者于闐諸部謂道行經為婆羅門書烏荼小乘謗大乘學作空華外道西乾尚爾此何驚乎良以六代宗師一期舉唱但破百年之暗靡營一室之隳殊不知

禪有理焉禪有行焉脫或戒乘俱急目足更資行不廢而理逾明法無偏而功兼濟然後始可與言禪已矣其如玄學多斥講家目為數寶之人終困屢空之室那不見經是佛言禪是佛意諸佛心口定不相違施設逗根用有時處況以經江高國紀之名論海總朝宗之會毘尼一學軌範千途授形俱築釋子之基唱隨行淨沙門之業擬捐三事何駕一乘終包不足之羞豈倒轉依之地通人不諳豎子何知佛事門中不捨一法吠聲貽責

遷怒傷人因擊鼠以破盆為爭搏而噬主自他俱有彼
我須均縱橫盡而成一秦氣劑和而成一味者也今從
貞觀及于宋朝於山選山露須彌而出海於羽求羽放
金翅以騰空令其鑽仰之儔慕此堅高之道矣吾徒通
達無相奪倫譬若文武是一人之藝不能兼者互相非
斥耳若相推重佛法增明酬君王度已之恩答我佛為
師之訓慎之哉慎之哉



宋高僧傳卷十三